

## ZAPISNIK

sa 23. sjednice Upravnog odbora  
Skijaškog/Smučarskog saveza Bosne i Hercegovine, održane 10.04.2018. godine u 18.00 sati  
u prostorijama Ski saveza BiH u Sarajevu

**Prisutni:** Đelal Hasečić, Miro Đukić, Milovan Jevtović, Zdravko Lasica, Ismar Biogradlić, Kenan Jažić, Jasmin Mehić, Muris Pozderac i Radenko Pekić članovi Upravnog odbora, Jelena Dojčinović Generalni sekretar.

**Odsutni:** Mario Laikert, Vladimir Lučić

Miro Đukić se zahvalio prisutnima i predložio dnevni red:

### DNEVNI RED:

1. Usvajanje zapisnika sa 22. sjednice Upravnog odbora;
2. Pregled prihoda i rashoda
3. Izvještaji komisija i trenera
4. Organizacija takmičenja Evropa Cup – molba SK Pale i SPD Jahorina
5. Prijedlog ugovora o saradnji EYOF 2019 – Ski savez BiH
6. Priprema za Izvještajnu i Izbornu skupštinu
7. Razno

Dnevni red jednoglasno usvojen sa jednom dopunom. Pod razno se uvrštava tačka Balkan kongres.

#### Ad. 1.

Zapisnik sa 22. sjednice je usvojen jednoglasno.

#### Ad.2.

Dojčinović dala uvodnu riječ na materijale prihoda i rashoda. Što se tiče prihoda navela da još nisu pristigla sva sredstva od IBU koja se očekuju, i da su prihodi veći od planiranih zbog uplata za Juniorski program koja prvobitno nisu planirana već je naknadno donešena odluka.

Kada su u pitanju rashodi Dojčinović je informisala članove UO da po sportovima nije niko otišao u minus ali da su manje više svi potrošili predviđena sredstva, te da je ostalo još uplata prema tehničkim organizatorima takmičenja i još nekoliko ugovora.

Rashodi kancelarije su u redu, s tim da će biti još neke razlike s obzirom da je period obračuna do 01.06.2018. godine. Kombi vozila i korištenje istih za reprezentativne svrhe je iznos veći nego što je predviđeno jer se nisu koristila klubska kombi vozila, već uglavnom rent-a-car.

Alpsko skijanje – Mehić je pitao oko troškova Ski kampa Švicarska. Dojčinović je rekla da ti rashodi nisu planirani kao ni prihodi, jer je naknadno došlo do realizacije tog projekta. Troškovi kampa su preko 3.000 KM što smo trebali pokriti za transport za tri kombi vozila. Kada su u pitanju uplate Seniora dogovoreno je da se uplata Evledine Muzaferija poravna sa dugom prema njima od Svjetskog Juniorskog prvenstva. Kod Juniora imamo manjak prihoda jer svi Juniori nisu uplatili sve rate (Đokanović, Petrović i Tadić) tako da imamo potraživanja po tom osnovu. Mehić je naglasio da treba u budućnosti napraviti da takmičari plaćaju program bez obzira na povrede i ostalo, jer se planovi unaprijed naprave i postoje fiksni troškovi. Takmičari su dužni uplatiti kompletan iznos programa.

Radenko Pekić smatra da Savez treba da preuzme finansijsek obaveze i da direktno plaća troškove mjerenja, sudija i sl. Ovime se ne bi isplaćivala sredstva klubovima, i tako bi se izbjeglo da klubovi ne isplaćuju dovoljan broj sudija i drugih troškova. Mehić se slaže da neke stvari

treba mjenjati te je dodao da je potrebno napraviti sporazum o saradnji sa EYOF 2019 u smislu korištenja nabavljene opreme (mjerne garniture, mreže, kapije, Bušilice i ostalo). To je neophodno iskoristiti kada je već oprema dostupna. Đukić je podržao prijedlog i Pekića i Mehića, s tim da treba vidjeti koji su to iznosi koje Savez treba pokrivati za održavanje takmičenja. Mehić je rekao da ne treba izlaziti iz budžeta koji je već planiran u prethodnom periodu, ali smatra da smo ove godine imali prevelik broj takmičenja a da za tim nema potrebe kada se govori o dječijim kategorijama. Smatra da je dovoljan broj 7 ili 8 takmičenja čime bi smo i kvalitetnije finansijski mogli pomoći organizatore.

Đukić je rekao da je u ski trčanju drugačije, jer neke trke ne finansira Savez već samo određeni broj trka. Ostale trke finansiraju klubovi.

Radenko Pekić smatra da se ovo pitanje treba urediti za narednu sezonu o čemu će trebati novi saziv Alpske komisije da raspravlja. Dodao je da treba više pomoći organizatore FIS takmičenja, po cijenu smanjiti naknade za dječija takmičenja, jer su troškovi mnogo veći.

Zdravko Lasica je rekao da se moraju napraviti konkretna pravila, u smislu tačno definisati po disciplinama broj potrebnih sudija koje će Savez plaćati i ostale stvari. Savez ne smije doći u situaciju da mu tehnički organizator određuje broj sudija, i ostalih troškova.

Muris Pozderac je predložio da Alpska komisija napravi izmjene pravilnika ukoliko je potrebno i da se tačno definiše šta Savez plaća i u kojem omjeru.

Jasmin Mehić je rekao da alpska komisija zajedno sa njim kao koordinatoru ima na umu ovo pitanje i da će se u budućnosti konkretno napraviti prijedlog.

Jednoglasno je usvojen zaključak da novi saziv alpske komisije zajedno sa koordinatorom napravi prijedlog izmjena finansiranja takmičenja.

Kod rashoda za ski trčanje pripreme i takmičenja su probijeni iznosi ali po drugim stavkama nema rashoda, tako da ski trčanje nije u minusu.

Snowboard je po planu, ostalo je dovoljno sredstava da odu na još jedne pripreme, s tim da će biti veći rashod od prihoda prikazan s obzirom da se učestvovalo na SES kupu u Srbiji, a što SES plaća. Tako da će i prihod biti veći, što znači da sredstva nisu potrošena iz drugog sektora već su samo veća za nekih 2.500 KM.

Biatlon je slično kao i kod ski trčanja, u nekim stavkama ima većih rashoda, dok u nekim ima manje, tako da će na kraju biti pozitivno stanje. Lasic aj epitao šta je sa razvojem biatlona. Dojčinović je objasnila da u stavci Juniorske ekipe spada i EYOF reprezentacija i mladi, i da ako je potrebno to se može razdvojiti. Lasic aje rekao da nema potrebe da je to dovoljno objašnjenje. Nakon što su pregledani i ugovori o djelu jednoglasno je usvojen finansijski izvještaj.

### **Ad. 3.**

Izvještaji po komisijama:

Alpsko skijanje – Mehić je rekao da je najveća promjena u protekloj sezoni uvođenje Juniorskog tima što se pokazalo kao najbolji potez u alpskom skijanju u protekloj godini. Omogućili smo djeci koja prelazi u FIS program mogućnost nastavka treniranja i takmičenja. Taj program su Juniori platili oko 4.000 KM što je dalo na značaju i ozbiljnosti njihov angažmana u programu. Smatra da treba da se nastavi sa ovakvim planom rada, jer se pokazao kao dobar. Sigurno će neko od tih Juniora ostati i naredne sezone i koji bi se mogli priključiti Seniorskom timu. Kada je u pitanju forma izvještaja na njoj treba još raditi.

Seniorska reprezentacija po Jasminovom mišljenju je postigla rezultate ispod očekivanja. Očekivalo se više kroz cijelu sezonu ali i na olimpijskim igrama. Najveći napredak je napravio Marko Šljivić, dok je Lokmić stagnirao ili blago napredovao. Izgubili smo dva takmičara i to Igora Laikert i Emanu Emrić. To su loši rezultati i potrebno je pokušati vratiti ova dva takmičara za naredni period. Svakako se ne slaže da Igor Laikert sam sebe ocjenjuje i istupa u medijima, i da je potrebno obaviti ozbiljan razgovor sa njim ukoliko želi dsa se vrati na većem nivou u reprezentaciju. Elvedina Muzaferija je također stagnirala kada su u pitanju rezultati. Mehić smatra

da treba za naredni period korigovati pravilnik i kriterije za reprezentacije odnosno postignute bodove. Također je potrebno polako ohrabriti trenere da se počne raditi pomalo i na brzim disciplinama. U ovoj formi izvještaja nedostaje mišljenje Alpske komisije o radu trenera i postignutim rezultatima. Kada je u pitanju rezultat na olimpijskim igrama generalno su loši rezultati, ali ako se gleda pojedinačne stavke ima svjetlih tačaka jer se radi o mladim takmičarima, o dobrim pojedinačnim vožnjama.

Mehić je zatim predložio da se već sada raspiše konkurs za trenere za naredni period i to sada na dvije godine kako bi smo poslali sliku da nudimo sigurnost i trenerima. Zamolio je prisutne da već na narednoj sjednici pokušamo riješiti trenere, a da se raspiše konkurs u narednih par dana.

Radenko Pekić smatra da je kompletno alpsko skijanje napravilo jedan dobar pomak, da je uvedeno dosta reda u neke segmente. Pekić je predložio da se što prije organizuje i sastanak sa roditeljima da se vidi ko ostaje u procesu a ko ne. Kada je u pitanju Igor Laikert treba se zauzeti stav o njegovim istupima u medijima. Pekić je pohvalio i Jasmina Mehić kao koordinatora što se zazuzeo da se neke stavri mjenjaju. Također je predložio da se ugovor sa trenerima može potpisati na period četiri godine za jedan olimpijski ciklus, ili dva plus dva period kako bi omogućili i ekipama da imaju stalni rad sa istim trenerima.

Hasečić je rekao da je realna ocjena koju je iznio Jasmin Mehić. Nastupi na olimpijskim igrama je vjerovatno maksimum koji naši takmičari u ovom momentu mogu dati. Ovo je prilika da se ocjeni i rad trenera. Podržao je prijedlog da se raspišu konkursi za nove trenere. Također smatra da je velika šteta gubitak dva takmičara koja su bila dobra, i neophodno je raščistiti sve probleme koji su doprinjeli tome.

Đukić se složio sa Jasminom da fali izvještaj alpske komisije. Pomalo je alpska komisija izgubila smisao, jer nije u redu da treneri direktno šalju izvještaje prema UO.

Kada su u pitanju konkursi za trenere smatra da je prerano o tome govoriti jer nije siguran da će se Skupština održati prije Septembra. Dojčinović je rekla da je veoma bitno da imamo Izbornu skupštinu do kraja Juna jer ćemo se dovesti u situaciju da moramo raditi u tehničkom mandatu, pa tako i trenerima možemo produžiti ugovore do Septembra. Haečić je rekao da nije to sporno, da se na izvještajnoj Skupštini mogu usvojiti i planovi za naredni period dok se Izborna ne održi. Jednoglasno je usvojeno da Izvještaj mora da sadrži i mišljenje alpske komisije i da se isti doradi u tom smislu.

Biatlon – Zdravko Lasica smatra da bi izvještaj trebao biti mnogo kvalitetniji. On lično kao koordinator nije zadovoljan biatlonom ove godine. Ono što je pozitivno je da imamo mlade takmičare ali da je neophodno znati ko će sa njima i raditi. S obzirom da imamo dovoljno novca trebamo odrediti trenera ko bi se bavio razvojem biatlona. Ponovno je naglasio da je neophodno da takmičari moraju potpisati neki vid deklaracije gdje će se navesti koji sport ima prioritet, biatlon ili ski trčanje. To je zaista neophodno uraditi, jer smo došli u situaciju da nam u izvještaju Biatlon komisije piše da u drugom dijelu je biatlon reprezentacija nastupala na FIS trkama. To je porazna rečenica i ne smije stajati u biatlon izvještaju.

Iako nemamo djevojaka ne treba puno žaliti jer imamo sjajne mlade momke i potrebno im je posvetiti puno pažnje. Nema potrebe da stagniramo uz ova finansijska sredstva. Kada je u pitanju Tanja Karišik-Košarac ona je imala izuzetnu godinu kada je postigla 23 mjesto na IBU kupom sa veoma malim zaostatkom. Ipak i pored dobrih rezultata ona nije uspjela otići na olimpijadu. Trener Lopatić je rekao sada kada smo najbolji Tanja ne ide na olimpijadu, na što mu je Lasica odgovorio da mi nismo najbolji već je Tanja najbolji a da smo mi najlošiji za sve ove godine. Tanji je bila potrebna nacionalna norma, i da kada su u pitanju nacionalni rezultati tu definitivno stagniramo. Još jednom Lasica napominje da se mora znati barem u zimskom periodu ko će raditi sa mladim takmičarima. Također je napomenuo još jednom da je neophodno da imamo podjelu između ski trčanja i biatlona jer smo i ove godine imali nesuglasica unutar reprezentacije zbog olimpijskih igara i sportova ko će gdje.

Milovan Jevtović smatra da se radi tako u biatlonu odavno i da je ovo samo epilog. Odavno nemamo trenera reprezentacije niti imamo reprezentaciju jer ne rade zajedno tokom čitave godine. Neophodno je da se postave barem improvizirane mete gdje bi se moglo trenirati a ne samo od kampa do kampa. Ima dosta takmičara koji su zainteresovani za biatlon i to treba iskoristiti.

Lasica se slaže sa Milovanom ali i takičari i treneri vode diplomatiju, jer idu kad im gdje odgovara da li u biatlon da li u ski trčanje. Još jednom je rekao Lasica da se nikome ne treba zabraniti da nastupi u oba sporta ali da se moraju posložiti prioriteta. Jasmin Mehić je na ovu temu naveo primjer i takmičarke sa olimpijade koja je uzela dvije zlatne medalje u alpskom skijanju a zatim i u snowboardu. Iz tog razloga možda se i ne mora tačno određivati prioritet sporta. To se može riješiti načinom finansiranja, tamo gdje primarno troši sredstva mora i nastupiti primarno u tom sportu.

Muris Pozderac je reako da je finansiranje u biatlonu i ski trčanje dosta drugačije i da iz tog razloga treba napraviti bolji sistem.

Milovan Jevtović je rekao da biatlon i ski trčanje nisu u ravnopravnom odnosu, i iz tog razloga se nije lako opredjeliti za sport. Samo u organizaciji takmičenja imamo jedno u biatlonu i desetak u ski trčanju.

Ismar Biogradlić je rekao da se ova tema ponavlja već dugi niz godina i da je potrebno riješiti te stvari, otkloniti sve probleme. Lasica je rekao samo da ne želi da dođe u situaciju da takmičar kaže da neće da ide na takmičenje u biatlonu a korisitio je sredstva za pripreme.

Dojčinović je rekla da se može napraviti neki model koji ne mora striktno razdvajati, ali jasno naznačiti na koji način se mogu trošiti sredstva za pripreme i takmičenja.

Nakon ove rasprave jednoglasno je usvojen izvještaj.

Ski trčanje – Kenan Jažić je obrazložio izvještaj komisije, te na kraju rekao da se iz isvjestaja ne vide eventualni pomaci ili nazadovanja takmičara. Neophodno je analizirati takmičare pojedinačno. Kada su pitanju ostavreni rezultati na olimpijskim igrama oni su izuzetno dobri pogotovo kada se zna da laden Plakalović nije trenirao jer je bio na obuci u Mostaru. Jažić je naglasio da se mora bazirati u budućnosti na omladinski program. Ipak i Tanja Karišik i Mladen Plakalović su ostavрили lošije bodove u odnosu na one sa kojima su ostavрили norme za odlazak na igre.

Lasica je rekao da na pripremama i takmičenjima u ski trčanju je boravilo 6 trenera, a želimo uspjeh. To nije moguće. Ne mogu svi biti treneri kako Milovan Jevtović kaže. Potrebno je barem na papiru da imamo ko je trener reprezentacije u ski trčanju. Jevtović je rekao da iz tog razloga što ima 6 trenera takmičari su svaki dan na treningu sa trenerima, dok u biatlonu toga nema.

Jažić je rekao da je ove godine bio izuzetno slab rad komisije jer na nekoliko sastanaka nije bio ni pozvan kao član komisije i kao koordinator za ski trčanje.

Nakon kraće rasprave o samom izvještaju jednoglasno je zaključeno da izvještaj treba doraditi i da mora proći kroz komisiju za ski trčanje.

Snowboard – Ismar Biogradlić je rekao da je ove godine napravljen dobar posao, jer sada imamo i solidnu žensku ekipu. Ukupni su pobjednici SES kupa što pokazuje da se dosta kvalitetno radi ali da uz dodatna finansijska sredstva se to može podići i na veći nivo. Biogradlić je također rekao da oni organizuju Evropa kup takmičenje što je takmičenje visokog nivoa i da je neophodno i na to obratiti pažnju.

Đelal Hasečić je rekao da su to objektivni pokazatelji i da to treba cijeniti sigurno i kroz finansijska sredstva. Jasmin mehić je rekao da je jako bitno definisati šta su prioriteta, da je neophodno omasoviti sport. Ismar je odgovorio da je snowboard izuzetno ekstreman i skup sport i da nije realno da imamo takmičara puno više nego što to sada imamo. Također je rekao da i FIS zna koliko je teško organizovati takmičenje u snowboardu pa je samim tim i postavila bodovnu listu, pa tako imamo u alpskom skijanju za 18 takmičenja 2 boda dok za 6 snowboard takmičenja dobijemo 4 boda. Iz tog razloga treba malo obratiti pažnju i kod finansiranja.

Kada je u pitanju Stefan Lazarević izvještaj za njegov dio je došao tek danas tako da nije uvršten u ovaj izvještaj.

Jednoglasno je usvojen izvještaj snowboard komisije.

Sudijska komisija – Muris Pozderac je odmah predložio da se izvještaj vrati na doradu jer ovo što su dostavili nema nikakve veze. Jednoglasno je usvojeno da se izvještaj vrati na doradu.

#### **Ad.4.**

Uvodnu riječ dala Dojčinović upoznavši prisutne da su pristigli zahtjevi za razmatranje aplikacije za organizaciju Evropa kup takmičenja u alpskom skijanju i to od SPD Jahorina u saradnji sa ski centrom Jahorina i Ski centar Ravna planina. Dojčinović je naglasila da je ovo izuzetno pozitivna stvar da imamo dvije aplikacije ali da treba vrlo oprezno razmatrati iste s obzirom da smo do sada prokockali dvije šanse za organizaciju takmičenja ovog nivoa.

Jasmin Mehić je također rekao da je ovo odlična vijest da imamo dva centra zainteresovana za organizaciju velikih takmičenja. Mehić je predložio nekoliko koraka koje treba sprovesti, te naglasio da se i FIS Kongres održava za nepuni mjesec dana i da već tu treba početi sa lobiranjem i radom na ovom projektu:

1. Sastanak sa ski centrima na kojem će se iznijeti i neki uslovi od strane Saveza, pa naprimjer da će se u tom centru naredne godine održati minimalno dva FIS takmičenja i dva dječija takmičenja, jer ako nemamo tih takmičenja ne treba nam ni Evropa kup. Oni moraju podržavati tehničke organizatore.

2. Aplikacija prema Savezu. Mora se aplicirati isključivo prema Savezu

3. Budžet, specifikacija, koje discipline i finansijska garancija aplikanta. Neophodno je da ski centar da finansijsku garanciju da projekat mogu iznijeti, jer i do sada smo aplicirali ali sve je palo u vodu kada dođe do finansiranja projekta. Da ne bi bili neozbiljni prema FIS to je neophodno.

Đelal Hasečić se u potpunosti slaže sa Jasminom Mehić pogotovo u smislu finansijskih garancija. Ispali smo neozbiljni prema FIS kada smo se našli u kalendaru a zatim otkazali. Nakon teških lobiranja što je najvažnije obezbjediti mi smo pali na finansijama.

Radenko Pekić je podsjetio da je SPD Jahorina dobila organizaciju Evropa kupa 2014 godine ali da Vlada RS nije mogla podržati projekat. Sada smo u situaciji da je ski centar Jahorina puno uradila na vještačkom osnježavanju i pripremi staza, što znači da bi iznos koji je sada potreban puno manji nego što je to bio slučaj prije. Ipak potrebna je finansijska garancija koju treba obezbjediti Vlada RS ili OC Jahorina.

Nakon kraće rasprave jednoglasno je zaključeno da se dogovore sastanci sa potencijalnim tehničkim organizatorima i ski centrima i to odvojeno, te da im se prezentuju uslovi svi te put ka apliciranju i eventualnom dobijanju mogućnosti organizacije. Ispred Saveza na sastanke i pregovore su nominovani da idu: Miro Đukić, predsjednik Saveza, Jasmin Mehić, koordinator za alpsko skijanje i Jelena Dojčinović Generalni sekretar Saveza. Nakon održanih sastanaka raspravljat će se o sljedećim koracima.

#### **Ad.5.**

Prijedlog ugovora za saradnju sa EYOF 2019. Dojčinović je dostavila prijedlog ugovora od strane EYOF 2019 koji je dostavljen na insistiranje Jelena Dojčinović. Mehić je rekao da je ovo ugovor o saradnji u smislu korištenja opreme, nabavke opreme od strane Ski saveza BiH i ostalo. Dojčinović je rekla da je okvirni ugovor a da će sve detaljnije stvari rješavati posebnim dokumentima. Jednoglasno usvojen ugovor i saglasnost za potpisivanje istog.

#### **Ad.6.**

Pripreme za Izvještajnu i Izbornu Skupštinu – Đukić je već prije naglasio da sumnja da ćemo imati mogućnost u Junu mjesecu održati Izbornu skupštinu. Mehić je rekao da smo sada u

situaciji da se svi trebamo založiti da se što prije održi Izborna skupština jer ili mi moramo jako puno raditi u naredna dva mjeseca ili ćemo to prepustiti nekom drugom. Moramo da znamo da imamo jako puno posla, od izmjena pravilnika, aplikacije Evropa kupa, formiranje reprezentacija, priprema i ostalo. Mehić je naglasio da što se tiče Ski saveza Federacije BiH odkuke će biti gotovo vjeorvatno do kraja Aprila. Dojčinović je već poslala obavještenja na entitetske saveze da su dužni što prije održati skupštine kako bi Savez mogao održati Skupštinu do kraja Juna. Prijedlog je da se u jednom danu održi i Izvještajna i Izborna skupština. Stari saziv usvaja izvještaje, novi saziv planove i programe.

Zaključeno je da se još jednom obavjeste entitetski savezi da se dostave svi prijedlozi do početka Juna i time pokuša izvršiti pritisak na entitetske saveze.

#### Ad.7.

- Pod tačkom razno raspravljano je o Balkan Kongresu. Dojčinović je informisala prisutne da su na prošlom Kongresu naši predstavnici Mumović i Lopatić preuzeli organizaciju narednog u BiH. Bitno je da se taj Kongres održi što prije radi održavanja IBU kongresa. Trenutno su sada dvije opcije: da prihvatimo organizaciju Kongresa ili da prepustimo Biatlon savezu Srbije što su se ponudili. Dojčinović je također navela da Balkan Konferencija nije zvanično registrovana i da je trenutno stanje veoma loše te iz tog razloga smatra da je najpametnije da prepustimo organizaciju Srbiji. Zdravko Lasica je dodao da je koordinator Balkan Konferencije bugarin koji je na prošlom IBU kongresu suspendovan na sve funkcije zbog pokušaja nametanja i lobiranja. Također je rekao da su Dojčinović i on tada na Kongresu donijeli odluku da podrže održavanje samo jednog takmičenja i to Blakanskog prvenstva s obzirom da Balkan kupovi se nisu mogli održavati zbog prepunog kalendara. Također kada je organizovana tetst trka za EYOF koja je ujedno trebalo biti i balkan kup nismo dobili dovolu za isto. S tim u vezi smatra da je trenutna situacija u Balkan konfrerenciji loša i da je potrebno vidjeti na sljedećem šta se može uraditi ka poboljšanju toga ili istupiti iz nje. Također je podržao prijedlog Dojčinović da prepustimo organizaciju Srbiji. Muris Pozderac je rekao da s obzirom da Mumović i Lopatić nisu tražili saglasnost za organizaciju Kongresa od Saveza treba da ga oni organizuju i plate troškove. Lasica je dodao da je jedna pozitivna stvar koja se treba riješiti na Kongresu je usvajanje prijedlog aizmjena pravila za norme i kriterije za odlazak na olimpijske igre. Nakon kraće rasprave Đukić je rekao da trebamo ostati članovi ove organizacije. Jednoglasno je usvojeno da se prepusti organizacija Biatlon savezu Srbije i da predstavnici Saveza budu Dojčinović i Lasica.
- Ismar Biogradlić je zatim pitao kakvo je mišljenje o nabavci novog kombi vozila, s obzirom da imamo sredstava. Dojčinović je rekla da sada nije vrijeme za to jer moramo ostaviti sredstava za pripreme. Đukić je rekao da novi saziv treba o tome odlučiti.
- Jasmin Mehić je pitao šta se dešava sa manifestacijom prglašenja najboljih. Dojčinović je rekla da se to organizuje uz Skupštinu.
- Jasmin Mehić je zatim rekao da sramotna odluka Olimpijskog komiteta BiH da trenerima da dnevnicu od nekih 5 eura, što je porazno. Moramo napraviti autoritet u budućnosti prema OK BiH i postaviti se oštrije i kada su pitanju dodjele stipendija te ostale stvari.

Sjednica je završena u 20.30 sati.

Originalni materijali sa sjednice Upravnog odbora Ski saveza BiH prilažu se primjerku Zapisnika koji se odlaže u arhivu Ski saveza BiH.

Sarajevo,  
10.04.2018.

Zapisnik vodila  
Jelena Dojčinović

Predsjednik  
Miro Đukić